



CODIGO DI PROTECCION

E BOLETIN CU TUR INFORMACION

CODIGO DI PROTECCION

MAART 2022 . EDICION 10

DEN EDICION AKI

TEAM DI CODIGO DI PROTECCION TA YENA DI ENERGIA, ENTUSIASMO Y DETERMINACION DEN 2022

TEAMBUILDING DEPARTAMENTO DI MUCHA Y HOBEN (I.O.)

ANCRANDO COLABORACION ENTRE UNICEF HULANDA Y ARUBA

ARUBA LO HAYA SU PROMEDOR FORENSICO DEN CUADRO DI COMBATIMENTO DI ABUSO SEXUAL Y VIOLENCIA RELACIONAL

MAS PASO CONCRETO DEN E TEMATICA DI ABUSO DI MUCHA Y VIOLENCIA RELACIONAL



DEN EDICION AKI

FAMILY JUSTICE CENTER DEN PLENO PROGRESO

COLABORACION ENTRE CODIGO DI PROTECCION Y E OTRO PROYECTONAN SOCIAL

KICK OFF MEETING 'ONLINE TOOLKIT & MAGAZINE' ENTRE ARUBA Y HULANDA

“CREANDO, MOVIENDO, INSPIRANDO, STIMULANDO E CAMINDANAN DI UN APORTE Y PRINCIPALMENTE TRAHANDO HUNTO PA UN INNOVACION DI CALIDAD DI BIDA PA NOS MUCHA- Y HOBENNAN”

“E AVANCENAN TA IMPLEMENTACION DI CODIGO DI PROTECCION TA CONTINUA DEN E DEPARTAMENTONAN CRUCIAL Y ESENCIAL DI E AREA SOCIAL”



TEAM DI CODIGO DI PROTECCION TA YENA DI ENERGIA, ENTUSIASMO Y DETERMINACION DEN 2022

FOR DI DECEMBER TEAM DI CODIGO DI PROTECCION TABATA BEZIG CU PLANIFICACION CONCRETO PA 2022, UNDA A TRAHA UN DOCUMENTO 'WERKPLAN 2022' COMO TAMBE A TRAHA NAN 'JAARVERSLAG 2021'. AMBOS DOCUMENTO TABATA UN EXCELENTE MOMENTO PA REFLEXIONA Y EVALUA HENTER E PROCESO Y POR MIRA BEK NA UN AÑA 2021 CU HOPI LOGRO CONCRETO Y RELEVANTE DEN HENTER E TRAYECTO DESAFIANTE DI IMPLEMENTACION DI CODIGO DI PROTECCION. NOS TABATIN E PLACER TAMBE PA TIN NOS SOSTEN TECNICO PROFESIONAL DEN PERSONA, STAN VAN HAAREN DI UNICEF HULANDA, UNDA NOS A PROBECHA TUR E TEMPO NECESARIO, PA STRUCTURA TUR E TRABOUNAN PA 2022 COMO TAMBE E PROCESO CU E FONDONAN RICIBI DI UNION EUROPEO Y NATIONAAL POSTCODE LOTTERIJ DI HULANDA. STAN CONTINUAMENTE TA TRAHA RIBA DISTANCIA, PERO E RELACION DI TRABOU CU NOS A CREA, TA UNO SUMAMENTE POSITIVO Y FRUCTIFERO. SU BALOR AGREGA TA ENORME DEN NOS TEAM Y HENTER E TRAYECTO, ESPECIALMENTE PA LOKE TA TRATA SU CONOCIMIENTO DI E TEMA, NETWORK Y EXPERIENCIA PROFESIONAL.



TEAMBUILDING DEPARTAMENTO DI MUCHA Y HOBEN (I.O.)

PA INICIA E AÑA 2022, E TEAM CHIKITO, PERO DINAMICO DI DEPARTAMENTO DI MUCHA Y HOBEN (I.O.), A PASA UN DIABIerna ATARDI TA CONOCE OTRO MIHO, P'ASINA POR SIGUI TRAHA RIBA EMPODERA Y FORTALECE OTRO DEN E PROCESO DI TRABOU. SHARLEEN TROMP TABATA ENCARGA CU E SESION AKI, UNDA A ENFOCA RIBA CREA RELACION DI TEAM SALUDABEL, UNDA CU CADA COLEGA POR A DESCUBRI NAN PERSONALIDAD, COMPRONDE NAN CARACTERISTICANAN PERSONAL PRIMARIO COMO SECUNDARIO Y E IMPORTANCIA DI BALOR DI APRECIACION INDIVIDUAL DENTRO DI UN TEAM. UN ATARDI HOPI ANEMO Y SIGUR RELEVANTE PA SIGUI TRAHA DEN UN AMBIENTE AGRADABEL, SALUDABEL, MOTIVANTE Y ENERGETICO. E MIEMBRONAN DI E TEAM TABATA: EFRAIM SUURENDONK, JULLIE-ANN THODE, DORILIS WERLEMAN, SURELLA CROEZE, ANOUK EMAN, CAROLINA THIEL SPAN Y SUE-ANN RAS.



ANCRANDO COLABORACION ENTRE UNICEF HULANDA Y ARUBA

DIA 22 DI FEBRUARI A FIRMA UN ACUERDO (MOU) PA ASINA ANCRA E COLABORACION ENTRE ARUBA Y UNICEF HULANDA. UNICEF HULANDA TA YUDANDO ARUBA CU DIFERENTE PROYECTO, UNDA POR EHEMPEL POR MIRA E AYUDO AKI DEN PROYECTO DI CODIGO DI PROTECCION. E SOSTEN CU E PROYECTO CODIGO DI PROTECCION TA HAYA TA DEN FORMA DI SOSTEN TECNICO PROFESIONAL, DEN PERSONA DI SR. STAN VAN HAREN, DI CUAL SU ROL TA PA DUNA SOSTEN PROFESIONAL Y DI EXPERIENCIA DEN HENTER E PROCESO DI IMPLEMENTACION DI CODIGO DI PROTECCION. E ACUERDO AKI TA YUDA FORTIFICA E COLABORACION ENTRE UNICEF HULANDA Y ARUBA, P'ASINA POR SIGUI CU E EHECUCION DI E PROYECTONAN CU TA TRATA E DERECHO UNIVERSAL DI NOS MUCHANAN NR. 19. DI PARTI DI MINISTERIO DI HUSTICIA Y ASUNTONAN SOCIAL, LO PERCURA PA PONE TUR PROFESIONAL DISPONIBEL, PA POR CONCRETISA Y EHECUTA E TRAYECTO AKI.



unicef 
voor ieder kind



ARUBA LO HAYA SU PROME DOCTOR FORENSICO DEN CUADRO DI COMBATIMENTO DI ABUSO SEXUAL Y VIOLENCIA RELACIONAL

POCO POCO PERO SIGUR, ARUBA TA SIGUI TRAHA RIBA E PASONAN CONCRETO DEN CUADRO DI COMBATIMENTO DI ABUSO SEXUAL Y VIOLENCIA RELACIONAL. RECIENTEMENTE NOS A HAYA E GRATO NOTICIA CU DR. VINCENT LATOUR, "JEUGD ARTS" NA DEPARTAMENTO DI SALUD PUBLICO, CU TABATA EHERCE E FUNCION ULTIMO COMO 'VERTROUWENARTS', A KEDA ESCOGI PA BAY SPECIALISA SU MES COMO MEDICO FORENSICO PA ARUBA. SU TAREA PRIMORDIAL LO TA PA ASISTI E CADENA HUDICIAL DEN INVESTIGACIONNAN FORENSICO, PA LOKE TA TRATA ABUSO SEXUAL Y VIOLENCIA RELACIONAL SEVERO. E PASO AKI LO FORTIFICA E INVESTIGACIONNAN PENAL COMO TAMBE E "SPORENONDERZOEK" NA MOMENTO CU UN CASO PRESENTA DILANTI UN HUEZ. CONSECUENTEMENTE LO PERCURA PA DUNA UN PERSONA UN CASTIGO MUCHO MAS HALTO. PUES E INVESTIGACIONNAN PRESENTA DILANTI HUEZ LO TA UNO MAS SOLIDO. ESAKI KIERMEN CU LO CONDUCI NA UN MIHO COOPERACION Y MIHO FLUHO DI INFORMACION ENTRE: JEUGD EN ZEDEN POLITIE, HOSPITAL, DIRECTIE VOOGDIJRAAD, DIRECTIE SOCIALE ZAKEN, BUREAU SOSTENEMI, MINISTERIO PUBLICO, VEILIGHEIDSHUIS, Y ALGUN DI E PARTNERNAN.

PA HOPI TEMPO CABA DVG HUNTO CU FAMILY JUSTICE CENTER A SONDEA E POSIBILIDADNAN PA UN MEDICO POR HAYA E ESTUDIO AKI, COMO TAL A LOGRA HAYA NETHERLANDS SCHOOL OF PUBLIC AND OCCUPATIONAL HEALTH CU TABATA DISPUESTO PA BRINDA E ESTUDIO AKI. A BASE DI ESAKI A PUBLICA E VACATURA DEN TUR E MEDIONAN DI COMUNICACION, COMO TAMBE NA ARUBAHUIS Y A HAYA UN TOTAL DI 4 PERSONA CU A SOLICITA. DR. LATOUR TABATA E UNICO CU TABATA CUMPLI CU TUR E REKISITONAN PA POR A SIGUI E ESTUDIO AKI. UNABES CU A HAYA E PROPOSICION PA DR. LATOUR TA ESUN, CONSEHO DI MINISTER A TUMA E DECISION, MIRANDO CU E LO BAY CU UN TAREA DI ESTUDIO, CUAL TA HOPI IMPORTANTE, PA POR GARANTISA CU ORA E CABA SU ESTUDIO E TRAHA PA PAIS ARUBA PA ALGUN AÑA. DI E FORMA AKI, TA GARANTISA TAMBE CU LO TIN E PROFESIONALISMO Y E SPECIALISMO AKI NA ARUBA PA E AÑANAN BINIDERO.

TEAM DI CODIGO DI PROTECCION TA SUMAMENTE CONTENTO CU E DESAROYO AKI Y KIER DESEA DR. LATOUR TUR CLASE DI EXITO CU SU ESTUDIO ASINA IMPORTANTE PA PAIS ARUBA Y CU PRONTO ARUBA POR TIN DEN CAS, SU PROPIO DOKTER FORENSICO.



MAS PASO CONCRETO DEN E TEMATICA DI ABUSO DI MUCHA Y VIOLENCIA RELACIONAL

TA BON PA SUBRAYA CU TIN VARIOS PASO CONCRETO HACI RIBA E TOPICO DI ABUSO DI MUCHA Y VIOLENCIA RELACIONAL DI PARTI DI GABINETE WEVER-CROES I Y II.

ALGUN DI NAN TA:

-A AUMENTA E CASTIGONAN MAXIMO, DI CUAL RECIENTEMENTE POR A WAK E FRUTONAN DI ESAKI, UNDA HUEZ A DUNA CASTIGO RELATIVAMENTE HALTO NA ESUNNAN CU A COMETE ACTO DI ABUSO SEXUAL DI MUCHA.

-A PERCURA TAMBE PA CERTIFICA TUR 'ZEDEN RECHERCHEURS' Y PSICOLOGO DEN E CADENA, PA NA MOMENTO CU UN CASO PRESENTA, E HUEZ POR TA SIGUR CU E PERSONANAN CU TA CONDUCI E INVESTIGACION AKI, TA CUMPLI CU E NORMA- Y STANDARDNAN INTERNACIONAL.

-ADICIONALMENTE, A BUSCA TUR E MATERIALNAN NOBO PA POR EKIPA E 'STUDIO VERHOORRUMTE' PA ASINA GARANTISA CU PAIS ARUBA TA CUMPLI CU E NORMANAN Y TAMBE CU E CASO CU TA PRESENTA DILANTI HUEZ, TA UNO SOLIDO.

-DENTRO DI POCO, PA PROME BES NA ARUBA, LO BAY INTRODUCI UN 'RECHERCHE PSYCHOLOG' SEGUN MINISTER TJON. E TAREA DI E PSICOLOGO AKI TA; PA ANALISA Y CONSEHA E DEPARTAMENTONAN INVESTIGATIVO PA LOKE TA E DECLARACIONNAN CU E VICTIMA- Y E TESTIGONAN TA DUNA, PA ASINA NA FINAL DI DIA POR CONDUCI UN INVESTIGACION HOPI MAS SOLIDO.

FINALMENTE NO TIN NADA MIHO CU TRAHA RIBA PREVENCION Y CONSCIENTISACION DI E TOPICO AKI. BRINDA PROTECCION NA MUCHA KIERMEN PREVENI Y RESPONDE NA VIOLENCIA CONTRA EXPLOTACION, ABUSO Y NEGLIGENCIA DI MUCHA. TUR MUCHA TIN DERECHO PA TIN PROTECCION Y CADA PAIS TIN CIERTO RESPONSABILIDAD TAMBE PA CREA E CONDICIONNAN NECESARIO P'E PROTECCION Y SIGURIDAD DI SU MUCHANAN TIN SU DEBIDO LUGAR Y ATENCION.



FAMILY JUSTICE CENTER DEN PLENO PROGRESO

TEAM DI CODIGO DI PROTECCION TA APLAUDI E PROYECTO NOBO AKI Y SIGUR TA CLA PA BRINDA CUALKIER SOSTEN Y/OF COLABORACION, UNDA TA NECESARIO. E PROYECTO FAMILY JUSTICE CENTER TA UN PROYECTO NOBO, NA UNDA E INSTANCIANAN HUDICIAL Y E INSTANCIANAN DI AYUDO SOCIAL LO TRAHA MAS HOPI POSIBEL BOU DI UN SOLO DAK Y DEN ALGUN CASO HOPI MAS CERCA DI OTRO. PUES HUNTO LO DUNA SERVICIO MAS COMPLETO POSIBEL NA E VICTIMANAN DI ABUSO SEXUAL Y VIOLENCIA RELACIONAL FISICO SEVERO. E INSTANCIANAN CU LO TRAHA HUNTO DEN ESAKI TA: JEUGD- EN ZEDENPOLITIE (JZP) Y CUERPO POLICIAL (KPA), HORACIO ODUBER HOSPITAL, DIRECTIE VOOGDIJRAAD, DIRECTIE SOCIALE ZAKEN, BUREAU SOSTENEMI, OPENBARE MINISTERIE, VEILIGHEIDSHUIS Y MAS PARTNERS.

NA JUNI 2021 TABATIN UN SIMAN DI ENCUENTRO INTENSIVO CU DIFERENTE PARTNER, UNDA A YEGA NA UN DOCUMENTO STRATEGICO Y TAMBE NA UN LISTA DI 22 PUNTO DI ACCION. ALGUN DI E 22 PUNTONAN AKI MESTER TA SOLUCIONA, PROME CU E PROYECTO INICIA, PA ASINA POR RICIBI CLIENTE. DEN E ULTIMO LUNANAN, E PROYECTO FAMILY JUSTICE CENTER, BOU LIDERAZGO DI SRA. DAPHNY TECKLENBORG Y SRA. ABIGAIL EMANUEL TA TRAHANDO RIBA VARIOS DI E PUNTONAN AKI, CUAL TA TRATA DI E PUNTONAN GRANDI DI CAMBIO PA ARUBA.

DURANTE LUNA DI DECEMBER, FAMILY JUSTICE CENTER A ORGANISA UN TRAINING PA E RECHERCHEURS DI JZP TOCANTE E PARTI DI 'KINDVERHOOR',

CONHUNTAMENTE CU EUROPEAN FAMILY JUSTICE CENTER ALLIANCE Y E COMPANIAKINTERVIEW. NA PROME INSTANTE E TABATA UN TRAINING DI TEORIA Y DESPUES TABATA TIN UN PARTI PRACTICO, NA UNDA E PROFESIONALNAN POR A TRAIN E COMBERSACIONNAN. PROME CU E TRAINING, JZP TABATA TIN UN SCARSEDAD DI RECHERCHEURS CU TABATA CERTIFICA PA HACI E KINDVERHOOR. DESPUES DI E TRAINING AKI, ENTRE JZP Y KPA TIN 8 RECHERCHERS CU TA CERTIFICA PA ESAKI.

DEN E TRAININGEN AKI TAMBE A PARTICIPA TRES PSICOLOGO DI DIRECTIE VOOGDIJRAAD, ORTHOPEDAGOGISCH CENTRUM Y KIA, CUAL LO DUNA SOSTEN NA E RECHERCHEURS Y TAMBE LO YUDA CU KINDERVERHOOR DEN E CASONAN DI E MUCHANAN MAS CHIKITO Y E CASONAN MAS COMPLEHO.

NOTA:

TA BON PA ACLAREA CU CODIGO DI PROTECCION TA UN FASE PROME CU EJC. CODIGO DI PROTECCION TA ENFOCA MAS RIBA E PARTI PREVENTIVO, PUES ORA CU TIN SOSPECHO DI ABUSO DI MUCHA Y E PROFESIONALNAN TA CUMINSA CANA E 5 PASONAN Y WAK SI NAN MES POR BRINDA E AYUDO Y/OF MESTER NOTIFICA BUREAU SOSTENEMI SI TA TRATA DI UN CASO CU TIN PELIGER STRUCTURAL OF COMPLEHO/AGUDO.



COLABORACION ENTRE CODIGO DI PROTECCION Y E OTRO PROYECTONAN SOCIAL

RECIENTEMENTE TABATIN UN REUNION FRUCTIVERO PA DELINEA Y FORTIFICA E COLABORACION ENTRE TEAM DI CODIGO DI PROTECCION, UNICEF HULANDA Y STUURGROEP SIGNS OF SAFETY. DESEO Y META TA PA BIN CU MAS STRUCTURA Y PALABRACION RELACIONA CU E ACTIVIDADNAN DI E DIFERENTE PROYECTONAN GRANDI CU TA TUMANDO LUGA, UNDA CU CODIGO DI PROTECCION, FAMILY JUSTICE CENTER, COJC, BUREAU SOSTENEMI, TA INVOLUCRA. PA DELINEA E CONTENIDO COMO TAMBE E CONEXION, E ACCION LO BIRA CU E LIDERNAN DI CADA PROYECTO LO BIN MAS REGULAR CU OTRO Y ASINA FINALMENTE YEGA NA PALABRACION CONCRETO DI ACTIVIDAD/PLANIFICACION ANUAL.

CODIGO DI PROTECCION A TUMA INICIATIVA TAMBE PA CREA 'INFOGRAPHICS' HUNTO CU E TEAM DI MINISTERIO DI HUSTICIA Y ASUNTONAN SOCIAL, UNDA LO ILUSTRA TUR E RELACIONNAN ENTRE E DIFERENTE PROYECTONAN AKI. TAMBE A PAPIA PA CREA UN RELACION DI COMUNICACION MAS DIRECTO, CU TA RAPIDO TAMBE, PA EVITA CU TA TRAHA BAND'I OTRO. DI E FORMA AKI LO POR TRAHA HUNTO Y LO PERCURA PA FORTALECE OTRO, UNDA TA NECESARIO.



SUE-ANN RAS, COMO COORDINADOR NACIONAL DI CODIGO DI PROTECCION, A MANDA E LISTA DI NOMBRE TAMBE DI SUPERVISOR DI CODIGO, UNDA CU CEDE TA BAY CHECK KEN TUR A HAYA TRAINING DI SOFS Y CON LO POR COMBINA E ROLNAN, TE UNDA TA POSIBEL DI 'MAATJES DI SOFS' Y SUPERVISOR DI CODIGO. DURANTE E SIGUIENTE REUNION, CU LO TA DIA 4 DI APRIL, LO CONTINUA CU E PROCESO DI COLABORACION STRUCTURA ENTRE E LIDERNAN DI E PROYECTONAN Ariba MENCIONA.

KICK OFF MEETING 'ONLINE TOOLKIT & MAGAZINE' ENTRE ARUBA Y HULANDA

DIA 17 DI MAART TABATIN UN KICK OFF MEETING, HUNTO CU E COORDINADOR NACIONAL Y E LIDERNAN DI PROYECTO DI CODIGO DI PROTECCION, AUGEO FOUNDATION Y UNICEF HULANDA, TOCANTE E DESARROYONAN DI UN 'ONLINE TOOLKIT' Y UN 'ONLINE MAGAZINE', CU A HAYA SUBSIDIO DI UNION EUROPEO. AMBOS HERMENT/INSTRUMENTO TIN COMO META PA DUNA SOSTEN PROFESIONAL DEN E IMPLEMENTACION DI CODIGO DI PROTECCION Y CON PA ANDA CU ABUSO DI MUCHA NA ARUBA. PA AMBOS HERMENT LO HACI UN 'NEEDS ASSESSMENT' CU UN GRUPO DI PROFESIONAL, CU TA CONSISTI DI E 4 SECTORNAN Y CONHUNTAMENTE LO DELINEA E PROCESO PA IDENTIFICA CUA LO TA E TEMANAN DI IMPORTANCIA Y RELEVANCIA P'E HERMENTNAN ONLINE.

E NOMBER CU LO UZA P'E 'ONLINE TOOLKIT' LO TA: CDP (CODIGO DI PROTECCION) ONLINE TOOLKIT, CU LO ENFOCA RIBA 5 TEMA. P'E REVISTA ONLINE LO TIN COMO 8 TOPICO, DI CUAL TAMBE AINDA MESTER INICIA E PROCESO PA DELINEA E TOPICONAN P'E PROFESIONALNAN. CDP ONLINE TOOLKIT LO TA UN HERMENT DI SOSTEN, CU TA HAYA UZO DURANTE E TRAININGNAN DEN E PROCESO DI E IMPLEMENTACION Y/OF EHECUCION DI CODIGO. AKI POR PENSA RIBA TOPICO MANERA; CON PA SEÑALA MAS EFICIENTE/BON DURANTE SOSPECHO DI ABUSO DI MUCHA OF CON BO POR HIBA UN BON COMBERSACION CU E MAYORNAN TOCANTE E PREOCUPACIONNAN CU ABO TIN COMO PROFESIONAL, NA MOMENTO DI SOSPECHO DI ABUSO DI UN MUCHA.



TAMBE E SUPERVISORNAN DI CODIGO POR UZA E CDP ONLINE TOOLKIT DENTRO DI NAN ORGANISACION, ORA NAN KIER PAPIA/INFORMA TOCANTE CODIGO Y CON PA ANDA CU (SOSPECHO) DI ABUSO DI MUCHA. E REVISTA DIGITAL LO CONTRIBUI NA E ASPECTO DI CONSCIENTISACION DI E PROFESIONALNAN TOCANTE E TOPICO DI ABUSO DI MUCHA Y KICO ABO COMO PROFESIONAL POR HACI. PUES LO ACERCA TAMBE VARIOS PROFESIONAL PA DUNA CONTENIDO RELEVANTE, ACTUAL Y DEN CONTEXTO DI ARUBA.

AMBOS HERMENT LO CONTRIBUI PA EKIPA E CONOCEMENTO ARUBIANO Y LO TA PONI DISPONIBEL P'E PROFESIONALNAN ARUBIANO, CU TA TRAHA CU OF PA MUCHA. AUGEO FOUNDATION LO BRINDA SOSTEN ONLINE TECNICO Y UNICEF HULANDA LO FUNGI COMO GUIA DI PROCESO Y LO DUNA CONSEHO DEN CONTENIDO, PERO SEMPER DUNANDO ESPACIO Y ULTIMO PALABRA NA E TEAM/PLATAFORMA DI PROFESIONAL FOR DI E 4 SECTORNAN PA CONTEXTUALISACION ARUBIANO.

MESTER WAK E CDP ONLINE TOOLKIT Y E REVISTA DIGITAL COMO PARTI DI UN FUNDESHI SOLIDO, BANDA DI E DESAROYO Y IMPLEMENTACION DI CODIGO, CENTRO DI HOBEN Y FAMILIA, COLLABORATIVE PARTNERSHIP Y FAMILY JUSTICE CENTER, UNDA CADA UN DI E 'BLOKINAN AKI' TIN COMO META FINAL: PA YEGA NA UN BON SISTEMA DI PROTECCION DI MUCHA NA ARUBA, P'ASINA NOS MUCHANAN POR LANTA Y CRECE DEN UN AMBIENTE PROTEGI Y SIGUR.

SECTOR DI ENSEÑANSA

“CREANDO, MOVIENDO, INSPIRANDO, STIMULANDO E CAMINDANAN DI UN APORTE Y PRINCIPALMENTE TRAHANDO HUNTO PA UN INNOVACION DI CALIDAD DI BIDA PA NOS MUCHA- Y HOBENNAN”

A BASE DI UN PETICION DI DIFERENTE PARTNER DEN E VELD DI ENSEÑANSA, MANERA COLEGIO E.P.I., UNDA A MIRA UN NECESIDAD DI BRINDA INFORMACION DI CODIGO DI PROTECCION NA ALGUN STUDIANTE Y DOCENTE. ESAKI NETAMENTE TA DIRIGI RIBA E STUDIANTE NAN CU DEN FUTURO LO TA E PROFESIONALNAN DEN VELD Y CU LO TA TRAHANDO CU MUCHA TE 18 AÑA, CU LO MESTER APLICA E LEY AKI DEN NAN TEMPORADA DI PASANTIA OF DEN UN FUTURO TRABOU.

DIA 13 DI JANUARI LIDER DI PROYECTO SECTOR ENSEÑANSA, JULLIE-ANN THODE, A HACI UN PRESENTACION DI CODIGO, NA E TEAM DI MONPLASIR BASISCHOOL. E SESION AKI A BAY DEN UN BON ATMOSFERA, CAMINDA A LOGRA DUNA UN SPLICACION AMPLIO RIBA CONTENIDO DI CODIGO Y TAMBE A DUNA SUFICIENTE ESPACIO PA TRECE E PUNTONAN DI ATENCION Y/OF PREOCUPACION DILANTI, MANERA: “E SISTEMA HUDICIAL DEN E DECISIONNAN TUMA PA HUEZ, NO BIAHA TA FAVORABEL PA E MUCHANAN, MIRANDO CU ESUNNAN LEGALMENTE RESPONSABEL PA CU E CUIDO DI E MUCHANAN, TA RICIBI DIFERENTE OPORTUNIDAD PA DRECHA NAN SITUACION DI PREOCUPACION”. ESAKI SIGUR TA UN PUNTO BALIDO Y CONOCI CERCA HOPI OTRO PROFESIONAL.

P’ESEY TA BON PA NOS ENFATISA Y SUBRAYA CU CODIGO DI PROTECCION TA MAS BIEN E PARTI DI PREVENTIVO DEN UN SITUACION DI POSIBEL PELIGRO OF SOSPECHO DI ABUSO DI MUCHA Y CU NO MESTER YEGA DEN E CADENA HUDICIAL.

DIA 26 DI JANUARI A PRESENTA E INFORMACION DI CODIGO DI PROTECCION TAMBE NA E TEAM DI JOHN WESLEY MAVO. POCO POCO, PERO SIGUR, CODIGO TA YEGANDO NA TUR E SCOLNAN DI E DIRETIVA DI SPCOA. UN EXPERIENCIA DI ENCUENTRO DEN SENO HOPI TRANKIL, PROFESIONAL, INTERANSTE Y CU TREMEMDO ACEPTACION PA CU E LEY AKI.

UN DI E STAKEHOLDERNAN IMPORTANTE DEN ENSEÑANSA, ESTA MDC, A PRESENTA NAN CONCEPTO DI PROTOCOL DI CODIGO. POR MENCIONA CU E CONCEPTO AKI TA UNO HOPI CLA Y SIGUR UNO PRACTICO, PA POR ENTAMINA NA MOMENTO CU PRESENTA UN CASO DI SOSPECHO DI ABUSO DI MUCHA.

DPS, SOAZA, SVEOA Y SOC, TA E DIRECTIVANAN DI SCOL CU AINDA FALTA PA TRAHA NAN PLAN DI IMPLEMENTACION Y UN PROTOCOL CONCRETO, REALISABEL Y EHECUTABEL. ESAKI LO SOSODE DEN E SIGUIENTE LUNANAN NOS DILANTI.



“E AVANCENAN TA IMPLEMENTACION DI CODIGO DI PROTECCION TA CONTINUA DEN E DEPARTAMENTONAN CRUCIAL Y ESENCIAL DI E AREA SOCIAL”

DIA 12 DI JANUARI MANAGEMENT Y ‘HOOFDLEIDSTERS’ DI BUREAU TRAIMERDIA FINALMENTE A RICIBI UN INTRODUCCION Y PRESENTACION DI CODIGO DI PROTECCION. LIDER DI PROYECTO SECTOR SOCIAL, EFRAIM SUURENDONK, CONHUNTAMENTE CU SU COLEGA; JULLIE-ANN THODE, A BRINDA E TEAM DI BUREAU TRAIMERDIA E INFORMACION NECESARIO, P’ASINA NAN TIN UN MIHOR COMPRONDEMENTO DI E CODIGO DI PROTECCION Y ALAVES HAYA E HERMENTNAN NECESARIO, CU LO FACILITA E FASE DI IMPLEMENTACION DI CODIGO DI PROTECCION DENTRO DI NAN INSTANCIA Y MANEHO DIARIO.

BUREAU TRAIMERDIA TA TRAHA CU E GRUPO META DI CODIGO DI PROTECCION, ESTA UN GRUPO GRANDI DI MUCHA DI 4-12 AÑA Y P’ESEY MES TA SUMAMENTE IMPORTANTE PA DICHO DEPARTAMENTO TIN NAN MANEHO CU E LEY AKI BON DELINEA Y IMPLEMENTA.

DIA 2 MAART, EFRAIM SUURENDONK Y JULLIE-ANN THODE, A REUNI CU MANAGEMENT DI BUREAU TRAIMERDIA, PA FINALMENTE YEGA NA UN PLAN CONCRETO DI E IMPLEMENTACION DI CODIGO DI PROTECCION. BUREAU TRAIMERDIA TIN SU MESUN STRUCTURA DI CUIDO HINCA DEN OTRO, PA LOKE TA TRATA E CUIDO Y PROTECCION DI E MUCHANAN Y AWO LO INCORPORA E PROCESO DI CODIGO DI PROTECCION. PUES NOS TA CONTENTO CU BUREAU TRAIMERDIA LO IMPLEMENTA E CODIGO DI PROTECCION RIBA UN TERMINO CORTO.

DIA 22 DI MAART E DOS SUB-DEPARTAMENTONAN IMPORTANTE DI DEPARTAMENTO ASUNTO SOCIAL (“BIJSTAND” Y “KOSTELOZE RECHTSKUNDIGE BIJSTAND”) A RICIBI E PRESENTACION Y INTRODUCCION DI CODIGO DI PROTECCION, P’ASINA PERCURA CU TUR E SUB-DEPARTAMENTONAN DI DAS TIN CONOCEMENTO DI CODIGO Y E PROCESO IMPLEMENTA. INTENCION TA PA AWO FINALISA E IMPLEMENTACION DI CODIGO PA E SUB-DEPARTAMENTONAN DI “GUIA SOCIAL” Y DI “BIDA Y FAMIA”.

PRONTO NOS LO START CU E WORKSHOP/TRAINING CODIGO/SIGNS OF SAFETY PA E DI DOS Y ULTIMO GRUPO DI E CENTRONAN DI CUIDO, PA ASINA POR LOGRA IMPLEMENTA E CODIGO DI PROTECCION NA UN MANERA EFECTIVO Y EFICIENTE DEN TUR E CENTRONAN DI CUIDO DI MUCHA NA ARUBA.





CODIGO DI PROTECCION

E BOLETIN CU TUR INFORMACION

MAART 2022 . EDICION 10

TUMA CONTACT CU NOS!



CODIGO DI PROTECCION



Belgiestraat 2, Oranjestad Aruba



(297) 528 1214



info@codigodiproteccion.com



www.codigodiproteccion.com